

მსოფლიო პატრიარქის სააღდგომო ეპისტოლე 2020



✠ ბართლომეოსი

წყალობითა ღმრთისათა

მთავარეპისკოპოსი კონსტანტინოპოლისა – ახლისა რომისა

და მსოფლიო პატრიარქი

ეკლესიას სისავსეს: მადლი, მშვიდობა და წყალობა დიდებით აღმდგარი ქრისტესი იყოს თქვენ ყოველთა თანა

უძვირფასესო ძმანო მღვდელმთავარნო და უფალში საყვარელო შვილებო,

მოიწია წმინდა აღდგომა და აღდგომის სიხარულის თანაზიარნი ვაქებთ უფლის დიდებას, რომელმაც სიკვდილითა სიკვდილი დათრგუნა, თანააღადგინა მთელი ადამის მოდგმა და განახვნა ჩვენთვის სასუფევლის კარნი.

ქრისტეს სხივმოსილი აღდგომა არის დადასტურება, რომ სამყაროს სიცოცხლეზე სიკვდილი კი არ უფლობს, არამედ ის მხსნელი, რომელმაც სიკვდილის ბატონობა გააუქმა. უწინ ჩვენთვის ცნობილი, როგორც უხორცო სიტყვა, შემდგომში კი – სიტყვა, რომელიც ადამიანის სიყვარულისთვის ხორციელ იქმნა, რომელიც მოკვდა როგორც კაცი და აღდგა როგორც ღმერთი, არის მხსნელი, რომელიც კვლავ მოვა დიდებით, რათა საღმრთო განგებულება აღასრულოს.

აღდგომის საიდუმლო და მისი გამოცდილება წარმოადგენს საეკლესიო ცხოვრების

საფუძველს. ბრწყინვალე ღმრთისმსახურება, წმინდა საიდუმლოებანი, ლოცვითი ცხოვრება, მარხვა და ასკეზა, სამოძღვრო მსახურება და სამყაროში კეთილი მონაზობა – ეს ყოველივე აფრქვევს სააღდგომო სიხარულის სურნელს. მორწმუნეთა ცხოვრება ეკლესიაში არის ყოველდღიური აღდგომა, „ზე-გარდამო სიხარული“, „ცხოვნების სიხარული“, და ასევე, „ცხოვნება როგორც სიხარული“.[1]

ამიტომაც არის, რომ წმინდა ვნების შვიდეულის მსახურებები არიან არა მწუხარებით, არამედ აღდგომის ძლევამოსილებით სავსენი. აქ ჩვენ აღმოვაჩინეთ, რომ ადამიანისა და სამყაროს ხსნის გეგმაში ჯვარს არ აქვს საბოლოო სიტყვა და ეს წინასწარვე გაცხადდა ლაზარეს შაბათს. ქრისტეს გულითადი მეგობრის მკვდრეთით აღდგომა არის წინასახე „საერთო აღდგომისა“. [წითელის პარასკევის] საგალობელი „დღეს დამოეკიდების ძელსა“ კულმინაციას აღწევს სიტყვებში „მიჩუწნენ ჩუწნ დიდებულისა შენი აღდგომა“. გარდამოხსნის წინ, ჩვენ ვგალობთ: „უგალობ ჯუარცმასა და დაფლუასა შენსა, ვაქებ აღდგომასა შენსა“. და სააღდგომო ღვთისმსახურებისას ჩვენ ხმამაღლა განვაცხადებთ ჯვრის ჭეშმარიტ მნიშვნელობას: „რამეთუ აჰა ესერა მოიწია ჯუარისა მიერ და აღდგომისა სიხარული ყოვლისა სოფლისა.“

აღდგომის „წმინდა და ჩინებული დღე“ არის „მერვე დღის“ განთიადი, პირველნაყოფი „ახალი ქმნილებისა“, ჩვენი საკუთარი აღდგომის გამოცდილება, დიდი „სასწაული ჩემი ცხოვნებისა“.[2] ეს არის ცოცხალი დასტური იმისა, რომ უფალი ჩვენთვის ევნო, რომ ჩვენი გულისთვის მოკვდა, და რომ ის ჩვენთვის მკვდრეთით აღდგა, „მოასწავებს რა ჩვენს აღდგომას საუკუნო ცხოვრებაში“.[3] მთელს საპასექო პერიოდში ჩვენ ვგალობთ, უპრეცედენტო პოეტურობით, იესო ქრისტეს ბრწყინვალე აღდგომის ანთროპოლოგიურ მნიშვნელობაზე, კაცობრიობის მონობიდან ჭეშმარიტ თავისუფლებაში გადასვლაზე, „წინსვლასა და ამაღლებაზე ქვემოდან ზემოთ და აღთქმული მიწისაკენ“.[4] ქრისტეს ეს მაცხოვრებელი განახლება ეკლესიაში ხორციელდება, როგორც ევქარისტიული ეთოსის დინამიური განფენა მსოფლიოში, როგორც „სიყვარულით ჭეშმარიტების მეტყველება“ (ეფ. 4,15), როგორც ღმერთთან სინერგია ქვეყნიერების ფერისცვალებისათვის, რათა შესაძლებელი იყოს სამყარო იქცეს საბოლოო განცხადების სისავსისა და ესქატოლოგიურ სამეფოში ღმერთის სიყვარულის ხატად. აღმდგარ უფალში ცხოვრება ნიშნავს მოციქულთა მსგავსად სახარების „ქვეყნის კიდემდე“ (საქმ. 13,47) განცხადებას. ეს არის პრაქტიკული მონაზობა გამოცხადებული მადლისა და „ახალი შესაქმის“ მოლოდინისა, სადაც „აღარ იქნება სიკვდილი, არც გლოვა, არც გოდება და ტკივილი, ვინაიდან გადაიარა უწინდელმა.“ (გამოცხ. 21,4)

ქრისტეს აღდგომისა და ჩვენი საკუთარი თანა-აღდგომის რწმენა არ უარყოფს სიკვდილის, ტკივილისა და ჯვრის მტკივნეულ არსებობას სამყაროს ცხოვრებაში. ჩვენ არ ვმაღავთ უღმობელ სინამდვილეს, და არც საკუთარი რწმენით ვიქმნით ფსიქოლოგიურ თავდაჯერებულობას სიკვდილის წინაშე. ამასთანავე, ჩვენ

შესანიშნავად ვიცით, რომ დღევანდელი ცხოვრება არ არის სიცოცხლე სისავსისა, რომ აქ ჩვენ ვართ „სტუმრები“, რომ ვეკუთვნიტ ქრისტეს, და რომ ვმოგზაურობთ მისი მარადიული სამფოსაკენ. ტკივილისა და სიკვდილის არსებობა, რამდენადაც ხელშესახები არ უნდა იყოს, არ წარმოადგენს საბოლოო რეალობას. ეს არის სიკვდილის საბოლოო გაუქმება. ღმრთის სამეფოში არ არსებობს არც ტკივილი, არც სიკვდილი, არამედ უსასრულო სიცოცხლე. „შენს ძვირფას ჯვარცმამდე – ვგალობთ – სიკვდილი საშინელება იყო ადამიანისთვის, მაგრამ შენი დიდებული ვნების შემდეგ, ადამიანი აძრწუნებს სიკვდილს.“ [5] ქრისტესადმი რწმენა გვაძლევს ძალას, სიმტკიცესა და მოთმინებას განსაცდელების გადასალახად. ქრისტე არის ის, ვინც „კურნავს ჩვენს ყოველ დაავადებას და გვათავისუფლებს სიკვდილისგან.“ ის არის, ვინც იტანჯებოდა ჩვენთვის, და დაგვანახა, რომ ღმერთი „ყოველთვის ჩვენთანაა“, და რომ ღმრთის სიყვარული ჩვენდამი განუყოფელად განეკუთვნება ღმრთის ჭეშმარიტებას. საღმრთო სიყვარულის ეს იმედიანი ჟღერადობა ექოდ ისმის ქრისტეს სიტყვებში გარღვეულის მისამართით: „გამხნევდი შვილო“ (მთ. 9,2); სისხლმდინარე ქალსადმი: „გამხნევდი ასულო“ (მთ. 9,22); მის ნათქვამში: „გამხნევდით, მე ვძლიე ნუთისოფელს“ (ინ. 16,33) და მის წამებამდე, შეპყრობილ წარმართა მოციქულს, რომელსაც ემუქრებოდა სიკვდილი: „გამხნედი, პავლე“ (საქმ. 23,11).

ახალი კორონავირუსის არსებულმა პანდემიამ აჩვენა, თუ რამდენად მყიფე ვართ ჩვენ, როგორც ადამიანები, რამდენად მარტივად გვეუფლება შიში და სასოწარკვეთა, რამდენად მყიფეა ჩვენი ცოდნა და თავდაჯერებულობა, რამდენად მოძველებულია წარმოდგენა, რომ სიკვდილი წარმოადგენს სიცოცხლის ბოლო მოვლენას, და რომ სიკვდილის დავიწყება ან ჩახშობა მასთან გამკლავების სწორი საშუალებაა. ეს შებლუდული სიტუაციები გვიჩვენებენ, რომ ჩვენ არ შეგვიძლია ეფექტურად ვმართოთ ჩვენი არსებობა, როდესაც გვწამს, რომ სიკვდილი არის დაუმარცხებელი რეალობა და გადაულახავი საზღვარი. მარადისობის იმედის გარეშე ადამიანის ყოფნა ძნელია. ეს იმედი ცხოვრობს ყოველი ექმის, ექთანის, მოხალისის, დონორის გულში და ყველა მათგანში, ვინც გულუხვად უჭერს მხარს თავიანთ ტანჯულ და-ძმებს, მსხვერპლის, შესანიშნავსა და სიყვარულის სულისკვეთებით. ამ დაუსრულებელ კრიზისში, ისინი ასხივებენ აღდგომასა და იმედს. ისინი არიან „კეთილი სამართლებები“, რომლებსაც, საკუთარი სიცოცხლის რისკის ქვეშ დაყენებით, ჭრილობაზე ასხამენ ბეთსა და ღვინოს; ისინი თანამედროვე „კვირინელები“ არიან გოლგოთაზე მათთვის, ვინც ავადმყოფობს.

ამ ფიქრებით, ყოვლადპატიოსანნო მღვდელმთავარნო და უფლისმიერ საყვარელო შვილებო, ჩვენ განვადიდებთ აღმდგარი უფლის სახელს, რომელიც ყველაფერზე მაღლა დგას და წყაროა სიცოცხლისა თავისი საკუთარი ნათლიდან, რომელიც ანათებს სამყაროს აღდგომის ნათელით. და ვვედრებით მას, ჩვენი სულებისა და სხეულის ექიმს, რომელიც სიცოცხლესა და აღდგომას ანიჭებს, რომ მისი გამოუთქმელი კაცთმოყვარეობით მოგვანიჭოს ჩვენთვის ძვირფასი საჩუქარი ჯამრთელობისა და ჩვენი ნაბიჯები სწორ გზაზე წარმართოს, რათა გავუზიაროთ თავისუფლების საღმრთო

საჩუქარი სამყაროს, მისი სრულყოფილების მოსწავებით, ზეციურ სამეფოში, რომელიც არის მამისა, ძისა და სული წმინდისა.

ქრისტე აღდგა!

ფანარი, აღდგომა 2020

✠ ბართლომეოს კონსტანტინოპოლელი
მარად თქვენთვის მლოცველი წინაშე ღმრთისა

1. მამა ალექსანდრე შმემანის დღიურები 1973-1983 (Crestwood, NY: St. Vladimir's Seminary Press, 2000), 137.
2. გრიგოლ ღმრთისმეტყველი, ბრწყინვალე აღდგომის შესახებ, PG 36.664.
3. გრიგოლ პალამა, წმინდა ამაღლების შესახებ, PG 151.277.
4. გრიგოლ ღმრთისმეტყველი, იქვე, 636.
5. „დიდება“, უფალო ღაღადვყავსა ზედა, 27 სექტემბრის მწუხრიდან.